



«БИЗНЕСІНІҢ ЖОЛ КАРТАСЫ»:
СУБСИДИЯЛАУ ЖӘНЕ КЕПІЛДІК БЕРУ

6



ҚАЛДЫРҒАН ІЗІН
МӘҢГІЛІК

13



ӘЛЕУМЕТТІК ЖЕЛІ:
ДҰРЫС ҚОЛДАНУ — ТАБЫС КӨЗІ

14



АКТӨБЕ

1924 жылдың 7 маусымынан бастап шығып келеді • 25 желтоқсан сенбі 2021 жыл, №149 (21.186) • www.aqtobegazeti.kz • aktobegazeti@mail.ru

ЖҰМА КҮНІ ОБЛЫС ӘКІМІ ОҢДАСЫН ОРАЗАЛИННІҢ КЕЗЕКТІ ЖҰМЫС САПАРЫ АЛҒА АУДАНЫНДА ЖАЛҒАСТЫ. БҰЛ КҮНІ АУДАНҒА ҚАРАСТЫ АУЫЛДАРДЫҢ БІРІНЕ КӨГІЛДІР ОТЫН ЖЕТСЕ, ЕНДІ БІРІНДЕ ДӘРІГЕРЛІК АМБУЛАТОРИЯ АШЫЛДЫ.

ЕРКІНКҮШКЕ ГАЗ ЖЕТТІ

Оңдасын Оразалин алдымен Алғаның Тамды ауылдық округіне қарасты Еркінкүш ауылына барып, газ құбырын іске қосуға арналған салтанатты шараға қатысты. 200-ге жуық тұрғыны бар ауылға көгілдір отын келді.

— Тәуелсіздіктің алғашқы жылдарында елде болған қиындықтарды жақсы білесіздер. Тынымсыз еңбек пен сабырдың арқасында біз сол қиындықтарды жеңе білдік. Бүгінде экономикамыз түзеліп, елде саяси тұрақтылық орнады, ауызбіршілік бар. Мемлекет басшысының тапсырмасына сәйкес ауылдық елді мекендерге көп көңіл бөлініп жатыр. Бүгін сондай бір тамаша сәттің куәсі болып тұрмыз. Қуаныштарыңыз құтты болсын! Газ құбырларын жүргізіп, уақтылы тапсырған мердігерлерге де рақмет, — деді облыс әкімі.

Дәл осы жерде Оңдасын Оразалинге облыстық энергетика және тұрғын үй-коммуналдық шаруашылығы басқармасының басшысы Ержан Мұздыбаев Алға ауданы бойынша газдандыру жұмыстарының қалай жүргізіліп жатқаны туралы баяндап берді.

— Жыл басында облыстағы 323 елді мекеннің 126-сы газбен жабдықталған болса, бүгінгі таңда көгілдір отынмен қамтамасыз етілген ауылдар саны 140-қа жетті. Nur Otan партиясының «Өзгеріс жолы: Әр азаматқа лайықты өмір!» сайлауалды бағдарламасы, сондай-ақ тәуелсіздіктің 30 жылдығы аясында биыл облыстағы 16 елді мекенге газ жүргізу жоспарланған болатын. Күні бүгінге дейін 14 ауылға газ жүргізілді. Жыл соңына дейін тағы 2 ауылға көгілдір отын барды, — дейді ол.

Бүгінгі таңда Алға ауданы 98,3 пайыз көгілдір отынмен қамтамасыз етілген. Биыл Амангелді мен Еркінкүшке газ келсе, келер жылы бұл қуанышты Жерұйықтың тұрғындары да сезінбек.

Салтанатты шарадан кейін облыс әкімі ауыл тұрғыны Мырзағали Амановтың шаңырағына барды. Көмір тасып, құл шығарудың бейнетінен құтылғанына бұл отбасындағы әйелдер қауымы ерекше қуанышты.

— Келін болып түскеніме 4 жыл болды. Бұрын күніміз от жағудан басталатын. Енді бір жұмысымыз жеңілдеді. Өте қуаныштымыз. Бұл барлық ауыл тұрғындары үшін ел тәуелсіздігінің мерейтойы аясындағы үлкен қуаныш болды, — деген отбасының келіні Альбина Оңғар осы уақытқа дейін қысқы отын сатып алуға 200 мың теңгеге жуық қаражат жұмсап келгендерін айтты.

Бүгінгі таңда облыс халқының 92,5 пайызы газбен қамтамасыз етілген. Респуб-



АЛҒА АУДАНЫ 98 ПАЙЫЗҒА ГАЗБЕН ҚАМТЫЛҒАН

лика деңгейінде облыс газбен қамтылу бойынша 5-орында тұр. Nur Otan партиясының жол картасына сәйкес 2025 жылға дейін облыстың 104 елді мекенін газбен қамтамасыз ету жоспарлануда.

АУЫЛДАҒЫ АМБУЛАТОРИЯ

Дәл осы күні Бесқоспа ауылдық округінің орталығы Есет батыр Көкіұлы ауылында дәрігерлік амбулатория ашылды. «Ауыл — ел бесігі» мемлекеттік бағдарламасы аясында медициналық мекемені салуға және жарақтандыруға 103 миллион теңге бөлінген. Бір қабатты ғимараттың жалпы аумағы — 440 шаршы метр. Тәулігіне 30 адамды қабылдайды.

— Мемлекет басшысының тапсырмасына сәйкес жергілікті атқарушы органдар халық тұрмысының деңгейі мен сапасын көтеру бойынша түрлі шараларды қабылдап жатыр. Атап айтар болсақ, денсаулық сақтау саласына ерекше көңіл бөлінуде. Бұл жұмыстар барлық ауылдық елді мекендерде де жүргізілуде. Биыл облыстағы бірқатар ауылдарда дәрігерлік амбулатория пайдалануға берілді. Барлығы қажетті заманауи жабдықтармен

қамтылған, — деген облыс әкімі ауыл тұрғындарының қуанышымен құттықтап, мұндағы қызметкерлерге сапалы қызмет көрсету басты міндеттердің бірі екендігін айтты.

Жаңа дәрігерлік амбулаторияда стоматологиялық кабинет те жасақталған. Мұнда аптасына 1 рет аудан орталығынан келген тіс дәрігері тегін қабылдау жүргізеді.

САПАЛЫ БІЛІМ — БОЛАШАҚ КЕПІЛІ

Сапар аясында Оңдасын Оразалин биыл күрделі жөндеуден өткен аудан орталығындағы Алға индустриалды-техникалық колледжіне барды. Іргетасы 1985 жылы қаланған колледж ғимаратының биыл шатыры, қасбеті, есік-терезелері, едендері, жылу және электр жүйелері жаңартылған. Бұл жұмыстарға қаражат «Өңірлерді дамыту» мемлекеттік бағдарламасы аясында бөлінді. Сондай-ақ оқу орнының материалдық-техникалық базасын нығайту бағытында «СНПС-Ақтөбемұнайгаз» АҚ-мен бірлескен жұмыстар атқарылуда.

Колледж директоры Нұргүл Ахметованың айтуынша, білім ордасында бүгінгі таңда 4 мамандық бойынша 200-ден астам

оқушы білім алып жатыр. Дуальды білім беру жүйесі енгізілген.

— Бүгінгі таңдағы ең өзекті мәселелердің бірі — маман тапшылығы. Бұл ауыл шаруашылығында да, ірі өндіріс нысандарында да, шағын және орта бизнесте де кездеседі. Бір ғана мысал, Дөң кен байыту комбинатының өзінде 400-500-ге жуық бос орын бар. Біздің қазіргі міндетіміз — материалдық-техникалық базаны нығайту. Жөндеу жүргізу, арнайы орта оқу орындарында барлық жағдай жасау, өйткені жастардың білім алуға ниеті бар және ол сапалы болу керек, — деді Оңдасын Оразалин.

Бұдан соң облыс әкімі колледждің жас спортшылары ұсынған допқа өз қолтаңбасын қойып, сәттілік тіледі.

— Біздің міндетіміз — сіздерге осындай жағдай жасау. Ал жақсы оқып, білікті маман болып шығу сіздерден талап етіледі, — деді ол.

Айта кетейік, биыл өңірдегі жер қойнауын пайдаланушылармен жасалған меморандумдардың аясында Ақтөбе облысында жеті колледждің материалдық-техникалық базасы жаңартылған.

Ақерке САТЫБАЛДЫ,
Алға ауданы.